

Úrskurðarorð:

Gæsluvarðhald kærða, Magnúsar Leopoldssonar, framlengist um 30 daga frá kl. 1111 11. mars 1976.

Mánudaginn 22. mars 1976.

Nr. 59/1976. **Ákærvaldið**
 gegn
Valdimar Olsen.

Dómendur:

hæstaréttardómararnir Magnús P. Torfason, Benedikt Sigurjónsson og Logi Einarsson.

Kærumál. Gæsluvarðhald.

Dómur Hæstaréttar.

Hinn kærða úrskurð hefur kveðið upp Örn Höskuldsson, fulltrúi yfirsakadómarans í Reykjavík.

Varnaraðili hefur samkvæmt heimild í 3. tl. 172. gr. laga nr. 74/1974 skotið máli þessu til Hæstaréttar með kæru 11. mars 1976, sem barst Hæstarétti 16. s. m. Krefst hann þess, að hinn kærði úrskurður verði úr gildi felldur. Þá krefst hann kærumálskostnaðar úr ríkissjóði.

Af hálfu ríkissaksóknara er þess krafist, að hinn kærði úrskurður verði staðfestur, „þó með þeirri breytingu, að gæsluvarðhaldstíminn verði lengdur frá því, sem ákveðið er í hinum kærða úrskurði“.

Með úrskurði sakadóms Reykjavíkur 26. janúar 1976 var varnaraðilja gert að sæta 45 daga gæsluvarðhaldi, og var sá úrskurður staðfestur með dómi Hæstaréttar 3. febrúar 1976.

Með skírskotun til forsendna hins kærða úrskurðar ber að staðfesta hann. Krafa ákærvalds um lengingu gæsluvarðhaldstíma kemur ekki til álita, þar sem af hálfu ríkissaksóknara var ekki gætt ákvæða 2. mgr. 174. gr. laga nr. 74/1974,

en vararíkissaksóknari sótti þing, þegar gæsluvarðhaldsúrskurðurinn var kveðinn upp.

Kærumálskostnaður verður ekki dæmdur.

D ó m s o r ð :

Hinn kærði úrskurður á að vera óraskaður.

Úrskurður sakadóms Reykjavíkur 11. mars 1976.

Ár 1976, fimmtudaginn 11. mars, var á dómþingi sakadóms Reykjavíkur, sem háð var í fangelsinu að Síðumúla 28 af Erni Höskuldssyni, kveðinn upp úrskurður þessi.

Hinn 19. nóvember 1974 hvarf Geirfinnur Einarsson frá Keflavík, hann sást síðast í Keflavík að kvöldi þess dags, og hefur hann ekki sést síðan.

Erla Bolladóttir, Kristján Viðar Viðarsson og Sævar Marinó Ciecielski hafa skýrt rannsóknarlögreglunni frá því, að þau hafi öll farið til Keflavíkur og þar niður að sjó, nánar tiltekið við Dráttarbraut Keflavíkur. Þeir Sævar og Kristján hafa skýrt frá því, að þeir hafi farið í sjóferð með nokkrum mönnum, þar á meðal Geirfinni Einarssyni, sem þeir telja sig þekkja á mynd. Hafi Geirfinnur Einarsson látið lífið í sjóferð þessari. Erla Bolladóttir kveðst hins vegar hafa hlaupið á brott og falið sig, er til Keflavíkur var komið.

Þau Erla, Sævar og Kristján Viðar hafa öll verið látin skoða ljósmyndir af 16 mönnum, og hafa þeir Kristján Viðar og Sævar Marinó sagt, að kærði, Valdimar Olsen, hafi verið í fôr þessari til Keflavíkur umrætt sinn, og Erla Bolladóttir hefur sagt, að hún haldi, að Valdimar Olsen hafi verið þarna.

Kristján Viðar Viðarsson hefur tekið framburð sinn í máli þessu til baka og síðan kannast aftur við að hafa farið í umrædda ferð með að minnsta kosti Erlu Bolladóttur og Sævari Ciecielski að Dráttarbrautinni í Keflavík. Hefur hann sagt, að honum finnst, að þetta ferðalag hafi eitthvað verið í sambandi við spíritus, þótt svo að hann muni það ekki. Þá hefur hann sagt, að hann treysti sér ekki enn sem komið er til þess að segja til um, hverjir voru staddir í Dráttarbrautinni þessa nótt auk hans og Sævars, en kveðst vera viss um, að hann þekkti eða kannaðist við fleiri, sem þar voru staddir.

Hinn 26. janúar sl. voru þeir kærði, Valdimar Olsen, Magnús Leopoldsson og Einar Bollason úrskurðaðir í 45 daga gæsluvarð-

hald vegna rannsóknar máls þessa. Þeir hafa allir neitað að hafa farið í umrædda ferð og að hafa nokkra hugmynd um afdrif Geirfinns Einarssonar.

Af hálfu ríkissaksóknara hefur verið gerð sú krafa, að kærði, Valdimar Olsen, verði úrskurðaður til að sæta áfram gæsluvarðhaldi og jafnframt að hafin verði dómsrannsókn á sakarefni máls þessa. Af hálfu kærða Valdimars hefur þessari kröfu verið mót-mælt.

Rannsókn máls þessa er ekki lokið, og á meðal annars eftir að fara fram dómsrannsókn með sakbendingum og samprófunum fyrir dómi.

Valdimar Olsen er grunaður um þátttölu í broti gegn XXIII. kafla almennra hegningarlaga og 60. gr., sbr. 61. gr. laga nr. 59/1969, og kann brot hans að varða fangelsisrefsingu. Skilyrðum 65. gr. stjórnarskrárinnar nr. 33/1944 um gæsluvarðhald er því fullnægt.

Rétt þykir með vísan til 1. og 4. tl. 67. gr. laga nr. 74/1974 að framlengja gæsluvarðhald kærða, á meðan rannsókn máls þessa verður fram haldið.

Ákveðst gæsluvarðhaldstíminn allt að 30 dögum.

Úrskurðarorð:

Gæsluvarðhald kærða, Valdimars Olsens, framlengist um allt að 30 dögum frá kl. 1055 11. mars 1976.